

Ո Ր Ո Շ ՈՒ Մ թիվ -222
Վարչական տույժ նշանակելու մասին

«01» հոկտեմբերի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Իսրայել Արամայիսի Կարապետյանի վերաբերյալ նյութերը.

Պ Ա Ր Զ Ե Ց Ի՝

2020 թվականի օգոստոսի 17-ին ՀՀ ՊԵԿ ՀՄՎ Մեղրի մաքսային կետ բաժնի աշխատակիցները մաքսային հսկողության գոտում զննման են ենթարկել ԻԻՀ-ից ՀՀ ժամանած աշխատակիցները մաքսային հսկողության գոտում զննման են ենթարկել ԻԻՀ-ից ՀՀ ժամանած Իսրայել Արամայիսի Կարապետյանի կողմից շահագործվող «KAMAZ» մակնիշի, «16 LT 439» հաշվառման համարանիշի բեռնատար ավտոմեքենան և բեռնատարի խցիկի նստատեղի տակից հայտնաբերել՝ մաքսային հսկողությունից թաքցրած 250 տուփ <<Matador>> գրառմամբ ծխախոտ, վարորդի խցիկի հանգստի հատվածից՝ 90 տուփ <<Davidoff>> և էլեկտրականության համար նախատեսված խցիկից՝ 40 տուփ <<MT>> գրառմամբ ծխախոտներ:

Փաստի առթիվ Իսրայել Արամայիսի Կարապետյանի նկատմամբ կազմվել է մաքսային կանոնների խախտման վերաբերյալ արձանագրություն, իսկ վերցված ծխախոտը՝ որպես իրավախախտման անմիջական օբյեկտ, վերցվել և ի պահ են հանձնվել Մեղրիի մաքսային պահեստում:

31.08.2020թ. նշանակվել է «Ապրանքագիտական փորձաքննություն», որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպությանը:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 18.09.2020թ. թիվ 22372010 եզրակացության համաձայն՝ փորձաքննությանը ներկայացված 1-ական տուփ <<MATADOR>>, <<DAVIDOFF>> և <<MT>> տեսակի ծխախոտի շուկայական արժեքը 2020 թվականի օգոստոսի 17-ի դրությամբ կարող էր կազմել համապատասխանաբար՝ 1 տուփ <<MATADOR>>-ը՝ 2800 ՀՀ դրամ, 1 տուփ << DAVIDOFF >>-ը՝ 3500 ՀՀ դրամ և 1 տուփ << MT>> -ն՝ 3000 ՀՀ դրամ:

Վարչական վարույթի ընթացքում 23.09.2020թ գրությամբ հարցում է կատարվել ՀՀ ՊԵԿ մաքսային հսկողության վարչություն ճշտելու ընդհանուր 380 տուփ ծխախոտի մաքսային արժեքը և վճարման ենթակա մաքսային վճարների չափը:

Մաքսային հսկողության վարչության 01.10.2020թ. գրության համաձայն՝ 2020 թվականի օգոստոսի 17-ի դրությամբ ոչ ԵԱՏՄ անդամ երկրներից ՀՀ ներմուծված 380 տուփ ծխախոտի մաքսային արժեքը կազմել է 430.889 ՀՀ դրամ: Միաժամանակ հայտնել են, որ ոչ ԵԱՏՄ անդամ երկրից նշված ապրանքները ներմուծելու դեպքում ոչ սակագնային կարգավորման միջոցների կիրառում չի առաջանում:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն

Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ, չներկայանալու դեպքում կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

2020 թվականի հոկտեմբերի 01-ին Իսրայել Կարապետյանը հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2020 թվականի օգոստոսի 17-ին Իսրայել Կարապետյանը, մաքսային հսկողությունից թաքցնելով՝ մասնավորապես հայտնաբերում դժվարացնող եղանակով՝ վարորդի խցիկի նստատեղի տակից ՀՀ մաքսային սահման

տեղափոխել է 430.889 ՀՀ դրամ մաքսային արժեքով, ընդհանուր՝ 380 տուփ տարբեր տեսակի ծխախոտ, այսինքն՝ թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, ՀՀ «Փորձագիտական կենտրոն» պետական ոչ առևտրային կազմակերպության փորձագետի 18.09.2020թ. թիվ 22372010 եզրակացությամբ, ՀՀ ՊԵԿ մաքսային հսկողության վարչության 01.10.2020թ. գրությամբ:

Վերոգրյալի հիման վրա և ղեկավարվելով ՀՀ Մաքսային օրենսգրքի 201-րդ հոդվածով, 206 և 221, 219, 224 հոդվածներով,

Ո Ր Ո Շ Ե Ց Ի

1. Իսրայել Արամայիսի Կարապետյանին (ծնված՝ 16.01.1973թ., ՀՀ, ք. Վարդենիս, Խ.Ստեփանյան փ. 9/7, անձնագրի համարը AR0303177) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված 380 տուփ ծխախոտի մաքսային արժեքի չափով՝ 430.889 ՀՀ դրամ:


/Հաշվեհամար՝ 900005024055/:

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ Մաքսային օրենսգրքի 98-րդ հոդվածի 4-րդ մասի համաձայն որոշումն ուժի մեջ մտնելու օրվան հաջորդող օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ